

**Regional News Unit AIR Aizawl  
Monday, June 03, 2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- **Kar kal ta Thawhlejni-a cyclone Remal behbawm ruahpui vanawn sur avanga leiminin a hnawl ruang la hmuh loh 5-te central YMA in a nawlpui a zawn a huaihawt chu vawiinah khar a ni ang.**
- **Mizoram Lok Sabha bial inthlanna a vote tlate naktuk zing dar 8 atanga chhiar tan turah tukin hian counting official-te duty-na tur siam fel a ni ang.**
- **Rouse Avenue Court chuan Delhi Chief Minister Arvind Kejriwal chua June ni 5 thleng judicial custody a awm turin a ti**
- **Germany-a tuilian avangin mi 600 chuang hmun him lamah sawn chhuah tawh an ni.**



**SEARCH OPERATIONS**

**Kar kal ta Thawhlejni-a cyclone Remal behbawm ruahpui vanawn sur avanga leiminin a hnawl ruang la hmuh loh 5-te central YMA in a nawlpui a zawn a huaihawt chu vawiinah khar a ni ang.**

**Thu dawn danin Central YMA hruaitute leh chhiat tawk branch YMA hruaitute hi nimin tlai lam khan inrawnkhawmin vawiin chawhnu lama a nawlpui a ruang zawn kharna hun hman dan tur hi an duang a. Mizo dana ni 7 zawn a nih tawh dawn avanga a nawlpui a zawn hi khar tur a ni a, zawn chhonzawm zel tho tura ngaih a ni.**

**Central YMA kaihhruaia vawiina ruang zawn hna thawk tur te hi hmun hrang hrangah an inthendarh dawn ,**

**Saikhamakawna innghakkhawm turte:**

- 1. Laipuitlang**
- 2. Ramhlun South**
- 3. Durtlang Leitan**
- 4. Leitan Ramthar**

**Melthum RV-a innghakkhawm turte**

- 1. Rangvamual**
- 2. Chite Veng**
- 3. Zemabawk West**
- 4. Zemabawk East**

**Tlangnuam West Hridaikawna innghakkhawm turte:**

- 1. Zemabawk South**
- 2. Zemabawk Bung Bangla**

3. Muthi
4. Chanmari West
5. Zuangtui

Serlui peng, Reiek Road :

1. Sihphir Venghlun
2. Zemabawk North
3. Muanna Veng
4. Mualpui ITI

Sihhmui kai ah Sihphir YMA an thawkchhuak ang a, Sihhmui Branch an pui ang a,

Tlawng Balu kai ah Selesih YMA an kal anga, Sairang an pui ang a.

Sairang Dinthar GOP kai :ah Edentharr in Sairang Dinthar an pui baw kang.

He chhiatna thlengah hian mi 34 an thi ni a hriat a ni a, an zinga mi 29-te ruang chu lak chhuah a ni a, Melthum ami ruang 4 leh Aibawk ami ruang 1 te la hmuh loh a ni. Melthum ami, leiminin an chenna a hnawl vanga la hmuh loh zingah hian thla 6 chauhva upa bakah kum 8 mi mipa naupang leh kum 11 mi hmeichhe naupangte an tel a. Aibawk ami hi an nupa a a hnawl an ni a, Hortoki khaw bula Tlawng lui a a nupui ruang an hmuh tawh hnu-ah ani ruang hi zawn mek zel a la ni.

Hlimen branch YMA hruaitute hnen atanga thudawn danin an ruang zawnte hi chhiatna thlenna hmun hnai a awm tawh lova ringin a thlang lam lui dang leh Tlawng lui dung thleng a zawn a ni a. Central YMA ruahmanna angin Aizawl veng hrang hrang YMA branch leh chhiatna thlenna veng leh khua bakah an veng/khaw thenawmte'n ruang zawn hna hi an thawk a ni.



SENTENCE

Aizawl a Special Court (Prevention of Corruption) chuan dik lo taka mipui sum hman a nih chungchangah Chakma Autonomous District Council (CADC) a chairman hlui leh a fapa bakah deputy chairman hlui hremna vawiin hian a puang dawn.

Special judge Dr. HTC Lalrinchhana chuan CADC chairman hlui Kali Kumar Tongchangya, a fapa Julius Tongchangya leh deputy chairman hlui Purna Muni Chakma te hi Zirtawpni khan eiruk thubu-ah thiam loh a lo chantir tawh a. Hemi ni vek hian jail-ah thawnin vawiin chhunah a hremna tur a puang dawn a. He'ng mi 3-te hi IPC section 409 leh Prevention of Corruption Act section 13 (2) leh 13 (a) & (b) bakah 120B IPC hmanga thiam loh chantir an ni.

He thubu-ah hi April 9, 2019 a Bangalore a hmunpui nei United Chakma Alliance (UCA) Vice President Pu Udondi Chakma an Mizoram Lokayukta a a thu thehluh, mipui sum dik lo taka hmanga Kali Kumar Tongchangya a puhna atanga lo intan a ni a.

Lokayukta hian ACB hnenah pe-in thubuui chu kum 2021 atang khan chhui tan a ni. KK Tongchangya hi a fapa Julius Tongchangya, khatih lai a Doon Uttarakhand khawpui Dehradun a PG College of Agriculture Science and Technology-a B.Sc. (Horticulture) a zir lai a a PA atana la-ah puh a ni a. A taka thawk si lovin chawlh pe chungin hlawh a la reng a. Thawk hauh lova a hlawh lak hi a vaiin cheng nuai 17, sing 3 sang 5 leh 183 a ni.

Hei bakah hian Julius Tongchangya ta 'Julius Fish Seeds Production Center', Udalthana-I chu sangha chi nuai 25 supply order cheng nuai 50 man CADC in an pe a. Sangha chi hi nuai 17 chauh, cheng nuai 34 supply si-in cheng nuai 50 hi pek vek niin Actual Payee Receipt-ah chuan tarlan a ni.

Hei chauh hi ni lovin leilet siamna atan Julius Tongchangya hi cheng nuai 1 leh sing 6 contract pek a ni bawk a . Deputy chairman hlui Purna Muni Chakma hi Julius Tongchangya hna a thuntu leh chawlh phalsaktu a ni a. KK Tongchangya hi ama fapa ngei sum tam taka hlawkna a neih theihna atana tha thawhtu a ni, tiin court chuan thiam loh a chantir a ni.

<><><>

#### COUNTING OF VOTES

April ni 19-a Mizoram Lok Sabha bial inthlanna a vote tlate naktuk zing dar 8 atanga chhiar tan turah tukin hian counting official-te duty-na tur siam fel a ni ang.

Election department hotute hnen atanga thu dawn danin tukin zing dar 5 khan counting official-te vote chhiarna dawhkan tur software hmanga chinfel (randomisation of counting officials) a ni tawh a. Hemi hnu hi chuan naktuk, June ni 4 zing dar 8 a vote chhiar tan thei turin ruahmanna engkim peih fel a ni tawh dawn a ni. Vote chhiar tur hian Returning Officer, Assistant Returning Officer, Counting Supervisor, Counting Assistant, Micro-Observer leh vote chhiar hna a tangkai tur dang, an vai-in mi 2,000 thelhin vote chhiar hna hi an thawk dawn a. Vote chhiarna hmunte hi venghimtute'n thua thumin an veng dawn a ni. Counting centre hi 13 a awm dawn a, 3 chu Aizawl district ami a ni a, a dang zawng chu district 10 hmunpui-ah pakhat theuh a awm ang. Assembly bial 40 tan Counting hall 40 a awm ang a. Vote chhiarna dawhkan 379 a awm bawk dawn a ni.

Vote chhiarna dawhkan pakhat zelah hian counting supervisor, counting assistant leh micro-observer te an awm ang a, Election Commission of India in Observer atana a ruatte'n an vil bawk ang. Aizawl centre-ah te chuan zing dar 8-ah postal ballot a vote tlate chhiar tan a ni ang a. Darkar chanve hnu-ah Electronic Voting Machine (EVM) a Control Unit a vote tlate chhiar chhonzawm a ni ang. District hmunpui dangah erawh chuan EVM a vote tlate dar 8 atanga chhiar tan nghal tur a ni. Assembly inthlanna-ah khan assembly bial khata polling station pakhat zel a EVM (Control Unit)-a vote tlate chu VVPAT a vote neite'n an vote-na lehkha them lo chhuak nen a inmil em tih endik vek a ni a. Lok Sabha inthlanna a vote tla chhiarna-ah erawh chuan assembly bial khata polling station 5 zelah EVM a vote tla leh VVPAT a lehkha themte hi a inmil em tih endik vek tur a nih avangin vote chhiar hun chung a tirei deuh dawnah ngaih a nih thu Election department hotute chuan an sawi.

Inthlan result hi district hmunpui tina media centre atanga puan chhoh zel a ni ang a. Aizawla Chief Electoral Officer pisa atangin a belkhawm puan chhuah zel tum a ni bawk a ni.

<><><>

## MONSOON SETS IN

Indian Meteorological Department-in thu a chhuah danin State dangte rualin Mizoramah pawh fur a lo intan ta a, ruah pawh tam tham tak sur thei reng dinhmunah a ding a ni.

Chhiatna laka mitin an him theih na'n chhung tinte mahni chenna ni leh a velte leimin theng palh thei a awm em tih uluk taka lo thlithlai reng turin sorkar chuan a ngen a. Mahni in bul hnaia tui luankawr te leh tuichhe paihna te tha lo lai a awm a nih chuan rang taka siam tha zel turin a ngen bawk a ni. Tuichhe paihna leh inchung atanga tui khawh thlakna (drain pipe)-te mahni in bul lui kawr a thleng ngei ngei tur a ni a, in bul lei charah a tawp ringawt tur a ni lo, tiin sorkar thupuan chuan a sawi a. Sawrkar Department tinte pawh mahni Department building theuhte uluk taka lo thlithlai a lo enfiah reng turin a ngen a ni..

Chhiatna thleng palh a harsatna tawkte chuan mahni District Emergency Operation Centre (DC Office) theuhte rang taka hriattir turin sorkar thupuan chuan a ngen bawk a ni.



## WORLD RECORD

Saitual khaw naupang Samuel Lalbiakhlua kum 11 chu International Book of Records chuan khawvela paragliding pilot naupang berah tunhnai khan a puang.

Samuel Lalbiakhlua hian khawvel hriat thamin kumin March ni 16 khan khawvel pum huapa paragliding tihna hmun sang ber dawttu leh Asia khawmualpui a sang ber, Himachal Pradesh a Bir Billing-ah bul a tan a. Mizoram Paragliding Association hruaitu Pi Varte Zaithanmawii kaihhraina hnuai-ah India ram chanchinbu liante chuan a chanchin hi an ziak chia chuai tawh a ni. A hlawhtlinna hi a namai lo hle a, ni 6 chhung zet nasa taka a inpuahchah hnu-ah hetiang hi a lo ni chho ta a ni. Kg 35 leka rit a nih avangin an hotute ngaih a tha chiah lo na a, hlahh nei lo leh hrat khawkheng a nih avangin hetiang dinhmun hi a thleng thei a ni. Pi Zaithanmawii chuan Guinness Book of World Records a a lan theihna turin an buaipui leh mek niin a sawi a ni.



## ARVIND KHEJRIWAL

Rouse Avenue Court chuan Delhi Chief Minister Arvind Kejriwal chua June ni 5 thleng judicial custody a awm turin a ti. Pu Khejriwal hi Delhi excise duty scam-ah sum chhehrelh thubuaiah man a ni a. Court chuan Enforcement Directorate lamin custody an dilna chu a pawmsak a. Nimina Rouse Avenue Court-a a inpek hnuah June ni 5 thleng judicial custody a awm turin a rel a ni. Court hnena a inpek hma hian Chief Minister Arvind Khejriwal hian an party hruaitute, party worker leh mipuite hmaah thu a sawi a ni.

Kumin March ni 21 khan Delhi Excise curty scam-a inhnamhnawiha puh anih avangin Arvind Khejriwal hi man a ni a. May ni 10 khan interim bail in a chhuak a, nimin khan a bail hun chhung hi tawpin Tihar jail ah a lut leh a ni.



## GERMANY FLOOD

Germany-a tuilian avangin mi 600 chuang hmun him lamah sawn chhuah tawh an ni. Tunhnaia ruahsur nasa chuan Germany chhim lamah tuilian nasa tak a thlen a. Donau,m Neckar leh Guenz luite chu an chim chin a san zel avangin khawpui leh thingtlang khaten tuilian an tuar nasa hle a. Tualchung media te sawidanin hmun thenkhatah chuan tun kum 100 chhunga an chim chin san ber tum a thleng a ni.

Bavaria-a district 10 ah chuan state of emergency puan a ni a. Neuburg-Schrobenhausen district ah mi 670 sawnchhuah an ni a. Meckenbeuren khawpuiah chuan mi 1300 chuang an chenna chhuahsan tura hrilh an ni bawk.

<><><>